



INTRODUCZIUN

DA FLURINA CAVEGN-TOMASCHETT

Bias lecturs e bias lecturas scrolan propabel il tgau duront leger questa lecziun. Igl appel allas dunnas da sesuttametter a lur umens plaida encunter tutta capientscha contemporanea arisguard l'egualitad denter um e dunna. Forzas reacziunaras dalla Baselia serefereschans meinsvart sin quests plaids da Paulus per metter las «femnas sin pantun».

Che Paulus seigi igl autur dalla brev sto vegnir tschentau en damonda. E buca meins sto vegnir mess en damonda ina recepziun dils texts che risguarda buca ils fatgs entuorn la derivonza dil sriver.

La lecziun ei ina cumpart dallas tablas da casa resp. digl uorden da casa che han igl intent da reglar la convivenza denter ils carstgauns che vivan dil temps dall'antica en in tenercasa: um e dunna, affons e sclavs. Igl usit da gliez temps, che la dunna duei sesuttametter agl um, ei surprida digl autur. Nunusitada ei denton l'admoniziun als umens, da carezar lur dunnas. E quei ligiom da carezia cumpareglia el cul ligiom da carezia denter il carstgaun che fuorma la Baselia e Cristus.

1. LECZIUN

Ef 5,21–32

Mes cars! Sesuttamettei in a l'auter en cumineivel respect enviars Cristus! Las dunnas duein sesuttametter a lur umens sco al Segner; pertgei igl um ei il tgau dalla femna, sco Cristus ei il tgau dalla Baselia, el il Salvader da quei tgierp.

Mo sco la Baselia ei suttamessa a Cristus, aschia duein era las dunnas sesuttametter als umens en tuts graus.

Vus umens, carezei vossas dunnas, sco era Cristus ha carezau la Baselia ed ei sesacrificaus per ella, per purificar e sanctificar ella cul bogn dall'aua e tras il plaid. Aschia vul el far cumparer la Baselia avon sesez en tutta splendur, senza maclas, rubaglias ni autras mendas, mobein sontga ed immaculada duei ella esser.